

UJIAN SUMBER KEKUATAN DALAM KEHIDUPAN

Oleh: Nur Fadhlina binti Mohd Pauzi, 1171788,

Fakulti Kepimpinan dan Pengurusan (FKP), Universiti Sains Islam Malaysia (USIM)

Disiarkan pada 23 Ogos 2020



“Tapi ustaz, saya selalu buat apa yang Allah SWT suruh malah apa yang dilarang sedaya upaya saya cuba untuk tinggalkan. Hari demi hari makin banyak pula ujiannya. Tidak mampu rasanya untuk diteruskan lagi hidup ini”.

Biasakah anda mendengar keluh kesah atau rungutan sebegini? Atau di bibir kita juga mungkin pernah diucapkan kata-kata sebegini?

Semua orang ada ujian masing-masing tetapi perbezaannya adalah bagaimana cara seseorang itu menangani ujiannya.

Mungkin ada orang bila tengah marah, makan adalah jalan penyelesaiannya. Ada orang bila tengah bersedih, deruan ombak dan kicauan burung menjadi temannya.

Ada juga yang hanya dengan tidur sekejap dapat memberi ketenangan lalu mencetuskan ilham untuk mengawal keadaan yang sulit dan sukar.

Berkata Abu Hurairah r.a., Rasulullah SAW bersabda bahawa Allah telah berfirman: “Aku selalu menuruti sangkaan hamba-Ku”. (Hadis riwayat Bukhari dan Muslim)

Sebagai analogi, hidup kita ini tak ubah seperti kuku. Walaupun sering dipotong, kuku kita tetap tumbuh.

Begitu juga dengan ujian yang hadir tanpa diminta, tanpa mengira sama ada ketika kita susah atau senang.

Penyelesaiannya hanya satu iaitu diri kita sendiri. Lihatlah sejauh dan seteguh mana kita meletakkan pergantungan kepada Allah Yang Maha Esa.

Namun, ada juga yang menganggap ujian sebagai musibah. Secara peribadi, saya tidak berfikiran sebegitu.

Saiz kasut dan pakaian setiap seorang daripada kita memang berbeza. Apatah lagi bila disebut soal hidup seseorang. Jika tidak meletakkan kaki ke dalam kasut mereka, belum tentu kita dapat tahu betapa sukar dan peritnya kehidupan yang dijalani.

Lihatlah cabaran atau ujian yang datang itu dari kaca mata Islam, nescaya pasti akan terbit ‘pelangi iman’ bagi menggantikan keresahan di hati.

Sesungguhnya kehidupan kita cuma sebentar. Dunia ini hanya tempat kita bercucuk tanam kerana di akhirat kelak hasilnya yang akan dituai. Jika kita menjaga tanaman tersebut dengan baik, maka eloklah hasil tuaiannya nanti.

Allah SWT berfirman dalam ayat 286, surah Al Baqarah yang bermaksud, “Allah tidak membebani seseorang melainkan sesuai dengan kesanggupannya.”

Cuba kita luaskan horizon pemikiran dengan menerima setiap ujian yang hadir dalam hidup sebagai sumber kekuatan agar diri kita tidak mudah goyah apabila dilanda badai kehidupan.

Ujian yang ditimpakan hari ini mungkin perit untuk kita melaluinya. Namun, yakinlah di hujung jalan pasti ada pelangi nan indah menanti. Jika tidak di dunia, pasti di akhirat yang abadi.

